

TEZĂUR LITURGIC

25 IANUARIE

ACATISTUL SF. CUVIOS ANATOLIE I ZERTALOV DE LA OPTINA



MOSCOVA, 2000



АКАФИСТ ПРЕПОДОБНОМУ И БОГОНОСНОМУ ОТЦУ НАШЕМУ АНАТОЛИЮ, СТАРЦУ И ИСИХАСТУ ОПТИНСКОМУ

Кондак 1

Изрядному делателю молитвы умныя,
богодохновенному учителю монашеских чинов,
старцу Анатолию похвальная восписуем. Ты же,
отче, настави нас на стези богоугодныя, да в
радости зовем ти:

Радуйся, Анатолие, зеркало молитвы умныя.

Икос 1

Мирскаго треволнения избежав, преподобне,
Богу посвящен быв от родителей, якоже Самуил.
Сего ради юношеское твое благочестие
похваляюще, вопием ти:

Радуйся, благочестивое Богу приношение.

Радуйся, боголюбивым родителем твоим
похваление.

Радуйся, от юности твоея противу греха
подвизавыйся.

Радуйся, в зрелости твоей венцем победы
венчавыйся.

Радуйся, молитвами детскими украсивый душу

твою.

Радуйся, слезами чистыми оросивый ланиты
твоя.

Радуйся, девство соблюл еси, яко зеницу ока.

Радуйся, молитву стяжал еси, яко Херувимския
очи.

Радуйся, Анатолие, зеркало молитвы умныя.

Кондак 2

Яко елень благороден притекл еси на пажить
старческаго окормления, выю твою повинув
богомудрому старцу Макарию, иже знаком
духовных речений тя напита. Ты же благодарно
Богу воззав: Аллилуия.

Икос 2

Иноческим житием вдохновивыйся, богомудре
отче, постничество, послушания, труды и бдения
строго держа. Сего ради окованный мужеством
сосуд души твоея соделал еси. Темже приими
похвалы сия:

Радуйся, послушнике прилежный.

Радуйся, иноче благоговейный.

Радуйся, монашескаго чина украшение.

Радуйся, ангельскому а

Икостоянию соревнователю.

Радуйся, добродетельми яко звездами уяснил еси
житие твое.

Радуйся, яко от тмы страстей очистил еси душу твою.

Радуйся, светлая во Христе совесте.

Радуйся, чистое о Бозе сердце.

Радуйся, Анатолие, зеркало молитвы умныя.

Кондак 3

Иосифом Прекрасным ты святитель Игнатий нарекл есть, отче Анатолие, егда о молитве умней ты вопроси. Ты же ясно учение святоотеческое возвестил еси ему. Темже удививыйся ответу твоему, возопи: Аллилуия.

Икос 3

Смирением яко покровом Божиим ты охраняше богомудрый старец Макарий и противу похвал обличеньми ты наставляше. Ты же укорения от старца яко воду чистительную принимал еси. Сего ради чистоте души твоея дивящися, сице тебе вопием:

Радуйся, благодушное укоризны терпение.

Радуйся, доблемудрое к трудам понуждение.

Радуйся, от мирских похвал удаление.

Радуйся, нищеты иноческия взыскание.

Радуйся, яко старцу твоему всякий помысл открывал еси.

Радуйся, яко всякую страсть мечем разсуждения заклал еси.

Радуйся, послушанием животворным волю свою

умертвивый.

Радуйся, нечувствие яко камень от сердца
твоего отваливый.

Радуйся, Анатолие, зеркало молитвы умныя.

Кондак 4

Умную молитву яко меч обоюдоострый восприял
еси, отче Анатолие, якоже в чине пострига
монашескаго о сем глаголется, имже посекал еси
плевелы страстей и всякое вражие приражение
отразив, присно взываяй Богу: Аллилуия.

Икос 4

Со смиренномудрием сочетал еси молитвенное
делание, отче мудре, яко против гордых демонов
брань подъял еси, в нейже победу законную
получил еси. Сего ради песенныя тебе
исплетаются венцы:

Радуйся, молитвы столпе.

Радуйся, смирения высоты.

Радуйся, гордых демонов попоаяяй.

Радуйся, молитвенным бичем их погоняяй.

Радуйся, светлых Ангелов умным созерцанием
привлекаяй.

Радуйся, иноческия чины сердечным умилением
вдохновляяй.

Радуйся, Иисусову молитву яко дыхание стяжал
еси.

Радуйся, ветром Духа Святаго в пристань

безстрастия достигл еси.
Радуйся, Анатолие, зеркало молитвы умных.

Кондак 5

Оптинских Старцев явился еси достойный
приемниче, яко степени добродетелей прошел
еси под водительством богомудрых отцев. Сего
ради дар сыноположения от Духа Святаго приял
еси, Богу отцев наших вопиюще: Аллилуия.

Икос 5

Ввоинился еси в полк Старцев Оптинских, отче
Анатолие, бронями благодати обложен и дарами
многообразными окружен Духа Святаго. Сего
ради спасаеши от бед к тебе прибегающих и в
благодарности зовущия:

Радуйся, равностоятелю отцев Оптинских.

Радуйся, единомысленниче святых Отцев.

Радуйся, церковного Предания непоколебимое
утверждение.

Радуйся, цевнице благозвучная мудрых
изречений.

Радуйся, даров многообразных благодати
сокровище.

Радуйся, скорый подателю многообразных
помощи.

Радуйся, яко унаследовал еси Амвросиеву
любовь богоподражательную.

Радуйся, яко Макариево восприял еси

богомудрие.

Радуйся, Анатолие, зеркало молитвы умныя.

Кондак 6

Образ монашеского совершенствования явил еси твоей пастве, отче Анатолие, яко на дщице души твоея начертал еси изящныя цветы многих добродетелей, наипаче же молитву непрестанную в сердце стяжав, Богу поющую: Аллилуия.

Икос 6

Терпением стяжал еси душу твою, по слову Христа Господа, в умнем делании пребывая день и ночь, присно взыскуя Господа, и обрел еси вход в клети сердечней в Царствие Божие. Сего ради песнопений тя величаем славословными:

Радуйся, делателю молитвы умно-сердечныя.

Радуйся, хранителю сокровища богодарованнаго.

Радуйся, лестнице Ангельскаго восхождения.

Радуйся, мосте переходяй страстей море.

Радуйся, яко благодати причастился еси тамошнего блаженства.

Радуйся, яко на земли живой гражданином был еси будущаго века.

Радуйся, имже восхождение в молитве обретаем.

Радуйся, имже нерадение духовное побеждаем.

Радуйся, Анатолие, зеркало молитвы умныя.

Кондак 7

Восхождение положил еси отче в сердце твоём, в горнее устремляясь благодарованною твоею молитвою, аможе достигл еси ангелоподобного совершенства, с лики бесплотными присно поя Богу: Аллилуия.

Икос 7

Оптинский старец Амвросий, яко виде тя, отче Анатолие, в возраст Христов пришедша, гражданина тя горняго Иерусалима нарекл есть, еще на земли живущаго. Мы же совершенству твоему чудящися, сице тебе зовем:

Радуйся, земный небожителю.

Радуйся, горняго Иерусалима служителю.

Радуйся, монашествующих богомудрый наставниче.

Радуйся, молитвенником духоносный учителю.

Радуйся, непарительное пребывание в молитве.

Радуйся, созерцательное устроение ума.

Радуйся, чистое зрение невечерняго света.

Радуйся, ясное видение сокровенных таин.

Радуйся, Анатолие, зеркало молитвы умных.

Кондак 8

Якоже от корене благаго произрасте близ Оптиной обитель Шамординская, юже насади богомудрый Амвросий, еяже управление духовное тебе поручи, отче Анатолие, да

наставиши сестры Богу достойно служить,
вопиющая Ему непрестанно: Аллилуия.

Икос 8

Светильник явился еси богозарный, отче
Анатолие, световодяй к не вечернему дню чада
твоя, от ноши неведения избавляяй и от
страстей изымаяй, вопиющих тебе сия:

Радуйся, светильник под спудом житейския
толстоты несокрытый.

Радуйся, граде на верху горы добродетелей
стояй сооруженный.

Радуйся, на тверде умней незаходимое светило.

Радуйся, на высоте духовней разсуждения
звезда.

Радуйся, сладким именем Иисусовым питаяй
чада твоя.

Радуйся, мечем обоюдоострым слова Божия
посекаяй враги твоя.

Радуйся, невестоводец церковный душ Богу
посвященных.

Радуйся, обручник монашеских чинов Церкви –
Невесте Христовой.

Радуйся, Анатолие, зеркало молитвы умныя.

Кондак 9

Литургии Божественныя был еси благоговейный
служителю, отче Анатолие, яко к Истинней Лозе
духом твоим привился еси, темже источил еси

яко сладкое вино поучения твоя веселящая сердца, и к трапезе Христовой привлекающая чада твоя, благодарно поющая Богу: Аллилуия.

Икос 9

Ангелов сослужащих тебе Божественную литургию сподобился еси имети, отче Анатолие, егда с праведным Иоанном пастырем Кронштадтским сослужил еси. Сего ради ангелоподобному твоему житию чудящися, ангелолепную тебе приносим хвалу:

Радуйся, Божественныя чаши умиленный причастниче.

Радуйся, Безкровныя жертвы трепетный совершителю.

Радуйся, небо отверзый молитвами твоими.

Радуйся, яко славословиши и ныне с Ангельскими чинми.

Радуйся, Ангелов яко диаконов имел еси тебе служащими.

Радуйся, Ангелоревностному Иоанну примером быв для подражания.

Радуйся, яко тебе ради тайнам Христовым с трепетом приобщаемся.

Радуйся, яко тебе ради на Литургию яко к Ангельскому служению поспешаем.

Радуйся, Анатолие, зеркало молитвы умныя.

Кондак 10

Возрастил еси сад в души твоей добродетелей
неувядаемых, отче Анатолие, пост и бдение,
целомудрие и чистоту, любви евангельскую и
молитву духодвижную, за ны Бога умоляющую,
еюже и поеши присно: Аллилуия.

Икос 10

Ароматами молитвы твоея благодарованныя
присно увеселяеши чад твоих, отче богоносне,
еюже и посещаеши и просвещаеши и спасаеши
от бед и напастей многоразличных, вопиющих
тебе сицевая:

Радуйся, молитвы боговдохновенная цевнице.

Радуйся, органе псалмопения, движимый Духом
Святым.

Радуйся, чистоты сердечныя строгое
соблюдение.

Радуйся, памяти о Бозе быстрое воспламенение.

Радуйся, от молитвы деятельное рождение любви
являеши.

Радуйся, от хранения ума духовный плод
созерцания показуеши.

Радуйся, имже пленений ума свободждаемся.

Радуйся, имже непрестанно молиться
научаемся.

Радуйся, Анатолие, зеркало молитвы умныя.

Кондак 11

Оптинского старчества светоносное украшение явился еси, отче Анатолие, добродетельми яко звездами просветивый житие твое, имиже твердь души твоея лепотну соделав, Богу украсившему небо звездами взывая: Аллилуия.

Икос 11

Твердь Церковную озарил еси отче сиянием молитвы твоея и якоже солнце богокрасное прогнал еси тьму бесовскую, лучами любве согреваяй чада твоя, демонская пополаяй полчища. Сего ради во свете деяний твоих якоже во дни ходяще сие тебе вопием:
Радуйся, солнцезрачный проповедниче.
Радуйся, молитвы богосиянный светильниче.
Радуйся, теплотою любве согреваяй чада твоя.
Радуйся, светом смирения пополаяй демоны.
Радуйся, во тьме неведения возсиял еси яко разсуждения звездо.
Радуйся, сердце твое явился яко небо невместимое.
Радуйся, сыне невечерняго дне.
Радуйся, трисолнечнаго Божества таинниче.
Радуйся, Анатолие, зеркало молитвы умныя.

Кондак 12

Чертог узрел еси, отче Анатолие, Христов украшенный, готовый прияти душу твою

облеченную в ризу брачную. Темже от одра смертнаго возстал, кресту поклонился еси и руки воздев, возопил еси: о Троице, приими душу мою, Тебе вопиющую: Аллилуия.

Икос 12

Естество понудил еси трудами постническими и вышеестественную светлость и ангелоподобную добродетель стяжал еси, отче Анатолие, ко Господу преставился еси, почестей венец от Него прием. Сего ради мы, чада твоя, словесный венец похвал тебе приносим:

Радуйся, молитвенная похвало оптинского старчества.

Радуйся, созерцательная высота труднодостижимая Ангелом.

Радуйся, яко чистоту ума стяжал еси присносиятельную.

Радуйся, яко Троичным Светом озарился еси богозрительно.

Радуйся, огнезрачным Серафимам подобниче.

Радуйся, шестокрылым Херувимам сликовниче.

Радуйся, умныя молитвы тихогласное произведение.

Радуйся, еяже таинственному сердцевращению нас научение.

Радуйся, Анатолие, зеркало молитвы умныя.

Кондак 13

О, возлюбленне авво Анатолие, веруем, яко чистою душею совершил еси путь истины правый, и предстоиши ныне пред Господом славы, в вечном свете небесных обителей, в лице Его верных служителей. Темже нас утомленных душевною борьбою, помяни в молитве святых, вопиющих Христу: Аллилуия. (трижды)

Молитва

О, Преподобне, богомудре и богопросвещенне отче наш Анатолие, старчества Оптинского светоносное украшение! Ты первее понудил еси ум твой тесными враты внутрь сердца входить и долготерпеливым подвигом тамо о имени Иисус Христове Царствие Божие искати. Сего ради не по мнозем времени достигл еси пред враты вождеденнаго безстрастия и еще на земли тебе сущу небесный гражданин будущего блаженнаго Царствия сподобился еси быти. Темже убо, отче приснопамятне, к тебе прибегаем, яко к наставнику искусному и просим и молим: научи ны, чада твоя, сему спасительному деланию еже внутрь сердца своего неотступно пребывати и неленостно Господа Иисуса Христа всем помышлением своим, всею крепостию своею любить и тамо призывати. Сохрани ны невредимы от всех навет вражиих, от всех прелестных сетей

дьявольских. Подаждь нам разум со смиренномудрием сей подвиг проходить, да не прельстит нас супостат, но да сокрушится его злоба о твердем камени имене Христова, нам же да явится сей камень незыблемо основание здания всех добродетелей.

Ей, отче, подаждь нам, яко учитель учеником, молитву молящимся юже вдохну в тя Дух Святый, да предстательством твоим и мы улучим приснодвижную молитву ко Господу Иисусу Христу. Ему же честь и поклонение и молитвенное славословие возсылаем со Безначальным Его Отцем и Пресвятым и Благим и Животворящим Его Духом, ныне и присно и во веки веков. Аминь.

